

Awor Felipe a **buska i haña** Natanaèl i a bis'é: "Nos a haña **Esun di Kende Moisés** a skirbi den e **Lei** i di **Kende e Profetanan** tambe a skirbi. Ta **Hesus di Nazarèt**, yu di Hosé." (**Juan 1:45**).

**Yeshua; Hesus di Nazarèt** ta personifiká e **Gloria** di **Dios Tata**.

Awor **SEÑOR** a bisa Abram: "Sali for di bo tera, i for di bo famianan i for di kas di bo tata, bai na e tera ku lo **Mi** mustra bo; i lo **Mi** hasi bo un nashon grandi, i lo **Mi Bendishoná** bo **Abundante**, i hasi bo nòmber grandi; i lo bo ta un **Bendishon (un fuente di Bondat)**. I lo **Mi Bendishoná** esnan ku **Bendishoná** bo, i esun ku **maldishoná (esaki ta mi rabiá i huisio)** bo, lo **Mi maldishoná (despresiá i deshonra)**. I den bo tur e famianan di mundu lo ta **Bendishoná**." (**Génesis 12:1-3**)

I mira, palabra di **SEÑOR** a yega Abram bisando: "E hòmbler aki lo no ta bo **eredero**, ma un ku lo sali for di bo mes kurpa, esei lo ta bo **eredero**." I **EL** a bai pafó kuné i a bisa: "Awor wak na e shelunan i konta e streanan, si bo por kontan." I **EL** a bis'é: "Asina bo desendentenan lo ta." E ora ei Abram a **Konfirmá, Kere, Konfia i para Firme** den **SEÑOR**, i **EL** a konta esaki komo **Hustisia (hasiendo bon relashoná ku Dios i hòmbler)** p'e. (**Génesis 15:4-6**)

Anto **EL** a bisa: "Siguramente lo **Mi** bolbe serka bo otro aña na e tempu aki; i mira, **bo esposa** Sara lo tin un **yu hòmbler**." I Sara tabata skucha na porta di e tèt ku tabata keda su tras. Awor Abraham i Sara tabata bieu, di edat avansá; Sara a pasa edat di haña yu. Pesei **Sara a hari den su mes**, bisando: "Awor ku mi a bira bieu, lo mi tin **Goso i Plaser, mi esposo** siendo bieu tambe?" (**Génesis 18:10-12**)

E ora ei **SEÑOR a bishitá Sara**, manera **EL** a bisa, i **SEÑOR a hasi pa Sara** manera **EL a primintí**. Asina **Sara a sali na estado** i a haña un **yu hòmbler** pa Abraham den su behes, na e tempu stipulá, di kual **Dios** a papia kuné. I Abraham a duna su **yu hòmbler** ku a nase p'e, ku Sara a haña p'e, e nòmber **Isaak (harimentu)**. (**Génesis 21:1-3**).

**Yeshua; Hesus di Nazarèt** ta personifiká e **Gloria** di **Dios Tata**.

Asina **SEÑOR** tabata papia kara kara ku **Moisés**, meskos ku un hende ta papia ku **Su Amigu**. E ora ei **Moisés** tabata bolbe na e kampamentu, ma su sirbidó Josué, yu hòmbler di Nun, un hòmbler hoben, sí no tabata kier a kita for di e tèt. E ora ei **Moisés** a bisa **SEÑOR**: "Mira, **Bo** ta bisami: 'Bai ku e pueblo aki!' Ma **Abo** mes no a lagami sa ken **Bo** ta manda huntu ku mi. Ademas, **Bo** a bisa: '**Mi** a konosé bo pa nòmber, i tambe bo a haña **Grasia** den **Mi bista**.' Pesei anto, mi ta roga **Bo**, si mi a haña **Grasia** den **Bo bista**, lagami konosé **Bo kamindanan**, pa mi konosé **Bo**, pa mi haña **Grasia** den **Bo bista**. Konsiderá tambe ku e nashon aki ta **Bo pueblo**." I **EL** a bisa: "**Mi Presensia** lo bai ku bo i lo **Mi duna** bo sosiegu." Anto **Moisés** a bisa **EL**: "Si **Bo presensia** no ta bai ku nos, no hiba nos for di akinan. Pasobra kon por ta konosí anto ku mi a haña **Grasia** den **Bo bista**, ami i **Bo pueblo**, si no ta pasobra **Abo** ta bai ku nos? Asina nos, ami i **Bo pueblo**, lo keda distinguí for di tur otro pueblo ku ta riba e superfisie di tera." I **SEÑOR** a bisa **Moisés**: "Tambe e kos aki di kual bo a papia, lo **Mi** hasi, pasobra bo a haña **Grasia** den **Mi bista** i **Mi** a konosé bo pa nòmber." E ora ei **Moisés** a bisa: "Mi ta roga **Bo**, mustra mi **Bo Gloria!**" (**Eksodo 33:11-18**).

**Yeshua; Hesus di Nazarèt** ta personifiká e **Gloria** di **Dios Tata**.

4 mei 2018

Sea Bendishoná den e Amor di Yeshua Mesias  
Rev. Remsly L Riley